

摘藻堂四庫全書薈要

集部

欽定四庫全書薈要

集部

御定歷代題畫詩類卷六十九

七十九

欽定四庫全書薈要

御定歷代題畫詩類卷六十九目錄

耕織類

題耕織圖二十四首奉懿旨撰
元趙孟頫

題耕織圖
明李進二首

題蠶桑綺陌冊
明董其昌

禾簇簇題鄒福所藏勤耕圖
元傅若金

省耕圖
明董其昌



省耕圖

明祝允明

閱耕圖

明張邦奇

應朋來臨別索題存耕舊隱圖

宋戴奎

題趙繼卿耕隱圖

元楊奐

題雲莊耕隱圖

元陶宗儀

謝君寄一犁春雨圖求詩為作絕句

宋陸游

謝耕道犁春圖

宋趙師秀

題謝耕道一犁春雨圖

宋魏了翁

題楊諭德東皋春雨圖

明楊榮

溪田過雨圖

明陳仲完

題劉逸人樂耕卷

明楊士奇

樂農卷

明陳振

書耕卷

明王恭

濯隴圖

明李廷儀

村田圖雜詠

明蔣冕

村田景

明蔣冕

趙千里田家四季圖 明僧西白二首

題申之寄示春郊畫軸 宋樓鑰

里社圖 元劉因二首

次韻玉堂畫壁 元袁桷

跋豐稔還鄉圖 元王惲

題石恪畫機織圖 宋黃庭堅

題樓攻媿織圖 元虞集三首

題紡織圖 元王惲

紡織圖

元貢奎

蠶桑圖

元吳師道

題錢舜舉畫蠶桑圖

明虞堪

題丹陽賀氏採桑飼蠶圖

明俞泰

題韓晉公邨田歌舞圖後

宋文彥博

次韻和文潞公題韓晉公村田歌舞圖後

宋韓琦

題申季山家所藏李伯時畫村田樂圖

宋戴復古

題村田樂圖

元虞集

題村田樂圖

元謝應芳

題富好禮所畜村樂圖

明劉基

田家留客圖

元納新

邨社醉歸圖

元陳旅

題李唐村社醉歸圖

元朱德潤

田家慶壽圖

明高啟

題田家娶婦圖

明程敏政

欽定四庫全書薈要卷一萬九千一百七十七

集部

御定歷代題畫詩類卷六十九

耕織類

題耕織圖二十四首奉懿旨撰

元趙孟頫

田家重元日置酒會鄰里小大易新衣相戒未明起老
翁年已邁含笑弄孫子老嫗惠且慈白髮被兩耳杯盤
且羅列飲食致甘旨相呼團團坐聊慰衰莫齒田硯藉
人力糞壤要鋤理新歲不敢閒農事自茲始

東風吹原野地凍亦已消早覺農事動荷鋤過相招遲
遲朝日上炊煙出林梢土膏脉既起良耜利若刀高低
徧翻墾宿草不待燒幼婦頗能家井臼常自操散灰緣
舊俗門逕環周遭所冀歲有成殷勤在今朝

良農知土性肥瘠有同時至萬物生芽蘖由地中秉
耒向畝畝忽徧西與東舉家往于田勞瘁在爾農春雨
及時降被野何濛濛乘茲各播種庶望西成功培根利
秋實仰天望年豐但使陰陽和自然倉廩充

孟夏土加潤苗生無近遠漫漫冒淺陂
芄芄被長阪嘉穀雖已植惡草亦滋蔓
君子與小人並處必為患朝朝荷鋤往
耨耨忘疲倦旦隨烏雀起歸與牛羊晚
有婦念將饑過午可無飯一飽不易得
念此獨長歎

仲夏苦雨乾二麥先後熟南風吹隴畝
惠氣散清淑是為農夫慶所望實其腹
酤酒醉比鄰語笑聲滿屋紛然收穫罷
高廩起相屬有周成王業后稷播百穀
皇天貽來牟長世自茲卜願言乘歲稔
四海盡蒙福

當晝耘水田農夫亦良苦赤日背欲裂白汗灑如雨
匍行水中泥淖及腰脊新苗抽利劔割膚何痛楚夫耘
婦當饑奔走及亭午無時暫休息不得避炎暑誰憐萬
民食粒粒非易取願陳知稼穡無逸傳自古

大火既西流涼風日淒厲古人重稼穡力田在匪懈
行省農事禾黍何旆旆碾以他山石玉粒使人愛大祀
須築盛一一稽古制是為五穀長異彼稊與稗炊之香
且美可用享上帝豈惟足食人一飽有所待

白露下百草莖葉日紛委是時禾黍登充積徧都鄙在
郊旣千庾入邑復萬軌人言田家樂此樂誰可比租賦
以輸官所餘足儲峙不然風雪至凍餒及妻子優游茅
簷下庶可以卒歲太平原有象治世乃如此

大家饒米麪何啻百室盈縱復人力多舂磨常不停激
水轉大輪磴碾亦易成古人有機智用之可厚生朝出
連百車莫入還滿庭勾稽數多寡必假布算精小人好
爭利晝夜心營營君子貴知足知足萬慮輕

孟冬農事畢穀粟既已藏彌望四野空藁秸亦在場朝廷政方理庶事和陰陽所以頻歲登不憂旱與蝗置酒燕鄉里尊老列上行肴羞不厭多魚羔復烹羊縱飲窮日夕為樂殊未央禱天祝聖人萬年長壽昌

農家值豐年樂事日熙熙黑黍可釀酒在牢羊豕肥東鄰有一女西鄰有一兒兒年十五六女大亦可笄財禮不求備多少取隨宜冬前與冬後婚嫁利此時但願子孫多門戶可扶持女當力蠶桑男當力耘耔

一日不力作一日食不足慘淡歲云莫風雪入破屋老
農氣力衰偃僂腰背曲索絢民事急晝夜互相續飯牛
欲牛肥芟藁亦預蓄蹇驢雖劣弱挽車致百斛農家極
勞苦歲豈恒稔熟能知稼穡艱天下自蒙福

右耕

正月新獻歲最先理農器女工並時興蠶室臨期治初
陽力未勝早春尚寒氣窗戶當與密勿使風雨至田疇
耕耨動敢不修耒耜經冬牛力弱相戒勤飯飼萬事非

預備倉卒恐不易田家亦良苦舍此復何計

仲春凍初解陽氣方滿盈旭日照原野萬物皆欣榮是
時可種桑插地易抽萌列樹徧阡陌東西各縱橫豈惟
籬落間採葉憚遠行大哉皇元化四海無交兵種桑日
已廣彌望綠雲平匪惟錦綺謀祇以厚民生

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶飢
當採桑何暇事遊遨田時人力少丈夫方種苗相將挽

長條盈筐不終朝數口望無寒敢辭終歲勞

四月夏氣清蠶大已屬眠高首何昂昂娥眉復娟娟不
憂桑葉少徧野如綠烟相呼攜筐去迢遞立遠阡梯空
伐條枚葉上露未乾蠶飢當早歸秉心靜以專飭躬修
婦事龜勉當盛年救忙多女伴笑語方喧然

五月夏已半谷鶯先弄晨老蠶成雪繭吐絲亂紛紜伐
葦作簿曲束縛齊榛榛黃者黃如金白者白如銀爛然
滿筐筥愛此顏色新欣欣舉家喜稍慰經時勤有客過

相問笑聲聞四鄰論功何所歸再拜謝蠶神

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞繰車響遠接村西東旬日
可經絹弗憂杼柚空婦人能蠶桑家道當不窮更望時
雨足二麥亦稍豐酤酒田家飲醉倒媪與翁

七月暑尚熾長日弄機杼頭蓬不暇梳揮手汗如雨嚶
嚶時鳥鳴灼灼紅榴吐何心娛耳目往來忘偃僂織為
機中素老幼要紉補青燈照夜梭蟋蟀牕外語辛勤亦

何有身體衣幾縷嫁為田家婦終歲復勞苦

池水何洋洋漚麻水中央數日庶可取引過兩手長織
絹能幾時織布已復忙依依小兒女歲晚歎無裳布襦
不掩脛念之熱中腸朝緝滿一籃莫緝滿一筐行看機
中布計日漸可量我衣既已成不憂天早霜

季秋霜露降凜凜寒氣生是月當授衣有布織未成天
寒催刀尺機杼可無營教女學紡纘舉足疾且輕舍南
與舍北嘒嘒聞車聲通都富豪家華屋貯娉婷被服雜

羅綺五色相間明聽說貧家女惻然當動情

豐年禾黍登農心稍逸樂小兒漸長大終歲荷鋤耒目
不識一字每念心作惡東鄰方迎師收拾令上學後月
日南至相賀因舊俗為女裁新衣修短巧量度龜手事
塞向庶禦北風虐人生真可歎至老長力作

冬至陽來復草木潛滋萌君子重其然吾道自此亨父
母坐堂上子孫列前榮再拜稱上壽所願百福并人生
屬明時四海方太平民無札瘥者厚澤敷羣情衣食苟

給足禮義自此生願言興學校庶幾教化成
忽忽歲將盡人事可稍休寒風吹桑林日夕聲颼颼
南地不凍墾掘為坑溝斫桑埋其中明年芽早抽是月
浴蠶種自古相傳流蠶出易脫殼絲纒亦倍收及時不
努力知有來歲不手凍不足惜冀免號寒憂

右織

題耕織圖 二首

明李進

西疇昨夜膏雨足村村綠樹啼布穀農夫相喚整鋤犁

早起驅牛出茅屋土腴牛健耕易深暖雲籠日春陰
斜陽未下終十畝一卷遺經行自吟山妻相敬如賓友
炊黍烹葵饁南畝溪邊濯足隴頭坐高歌且盡壺中酒
年來不用憂旱澇高田宜黍低宜稻官租納足食有餘
社酒雞豚自相勞人言耕夫苦我道田家好但願五風
十雨年穀登室家團團永相保

吳蠶作繭明於雪苔溪之水清且冽東鄰西舍縑車鳴
銀絲出盆光皎潔官稅已輸私債還美人曉織綠窗間

嬌鶯睨皖機聲度春筍參差玉指攀織成素絹堅且緻
先奉翁姑後夫壻朔風吹水霜雪飛夫不憂寒妾如意
君不見青樓豔女好娥眉留客高歌送酒卮纏頭蜀錦
不知數黃金莫盡朝別離不如田家荆布妻貧富苦樂
長相隨採桑養蠶繅好絲年年織絹製郎衣

題蠶桑綺陌冊

明董其昌

百里春申路欣歌田畯詩行車膏作雨沃野錦為陂子
婦饑堪餉曾孫稼若茨誰能憂藿食慈母更農師

禾簇簇題鄒福所藏勤耕圖

元 傅若金

禾簇簇禾簇簇去年缺雨今年足人家耕種少得閒一
春強半田中宿塘上水生禾欲齊春禽愛近落花啼出
入無人看門戶野庭一任人來去有時耕罷亦長吟歸
來不記入村深書編從挂牛角上詩卷閒留桑樹陰田
家小心畏法令嘗願秋租得餘剩鄰翁昨日到城還聞
說官家有新政民間禁馬不禁牛有牛耕田君莫愁

省耕圖

明 董其昌

融風扇時燠東臯農事起田畯遵時令平秩從茲始溝
塍迂以直畚鍤煙雲裏腰鎌乍刈葵攜饁齊炊黍鶉野
際熙陽鸞旂麗京坻檐檐撫籍衣剌剌染場履天近雨
粟多日臨土膏美汗漫八駿游蕪沒三推址睠此省耕
儀風規傳畫史願置黼座前勞農振前軌

省耕圖

明
祝允明

老農真我事何敢笑樊須植杖芸苗處伸眉納稅餘鉏
頭三寸澤田舍五行書飽飯高眠熟朱門未必如

閱耕圖

明張邦奇

春雨肥東菑春風吹短褐一犁但使衣食充百畝長遺
子孫活君不見扣角歌聲暫歇他日逢時作伊葛

應朋來臨別索題存耕舊隱圖

宋戴奎

憶昔百丈巖前遊泊船去登湖上樓天清野曠一凝望
錦屏森列當前頭中見蒼崖拔地起絕憐嘉木連雲稠
窈窕回溪出僧宇參差危磴生懸流人言此地儻歸隱
布衣便欲輕公侯茅屋春深薜荔長石闌路遶叢篁幽

長鏡茯苓靜可劖空林柿葉寒仍收回頭世事忽如蠅
廿年誤向紅塵住不知何日繼追尋每憶此山勞夢寐
應君示我新畫圖開卷中堂起煙霧摩挲濃墨思舊經
却似登樓看山處君謂松根即故廬一榻左右俱圖書
沙田水足牛力壯歸耕試論今何如先王井田法已墜
阡陌鈎連屬豪貴前年東家強索租今年租入西家去
白雲蒼狗在須臾能事只耕方寸地父老同知稼穡難
兒孫共獲菑畲利秋風歸帆我獨遲石田草莽耕何時

君行已得圖中意臨分為寫存耕詩

題趙繼卿耕隱圖

元楊奐

惜君玉雪成老醜知君近出太常後求田問舍計差早
恐君不是扶犁手長安冠蓋鬧於雲但說子真耕谷口
此心肯處萬事了直待鐘鳴奈衰朽溪山入眼畫樣新
雨翠煙嵐浮戶牖松亭可琴水可舟中有石田三百畝
剩鉏烏豆種紅秫十畝桑麻居八九軟浸豈屑飯晨犢
濃湯秫腴篤社酒冷盆繅絲給公上挑燈紡績裹妾婦

索錢豪吏喜食肉準備羹材養雞狗荆棘滿野獨漏網
太常遺澤亦已厚軍興科徭古不免為勸比鄰死莫走
殘年得飽實大幸傍舍偎籬插花柳君家平日無雜賓
我輩過門須一叩若非代北少陵翁定是周南紫陽叟
更闌朗詠除夜篇聊與蒼生起塵垢

題雲莊耕隱圖

元陶宗儀

亂雲深處水回環南畝無多屋數間曉起一犁春雨足
夕陽牛角挂書還

謝君寄一犁春雨圖求詩為作絕句

宋陸游

說著功名我自羞喜君解劍換吳牛莫將江上一犁雨
輕博人間萬戶侯

謝耕道犁春圖

宋趙師秀

春雨年年有良田歲歲無何因將此事須要畫為圖野
水寒初退平林綠半蕪長謡謝沮溺未必子知吾

題謝耕道一犁春雨圖

宋魏了翁

牀頭夜雨滴到明邨南邨北春水生老婦攜兒出門去
老翁赤脚呵牛耕一雙不借挂木杪半破夫須衝曉行
耕罷洗泥枕犢鼻臥看人間蠶觸爭

題楊諭德東皋春雨圖

明楊榮

春至時雨降駕言向東皋驅牛種嘉苗稂莠亦以薅所
期歛獲豐詎辭筋力勞時復事簡編或以酌醴醪熙然
隴畝間此樂奚其高挂冠未有期南望徒鬱陶託此寓
幽意毋使心忉忉

溪田過雨圖

明陳仲完

時雨忽已徧羣山朝來晴溪田漲新綠溝澮悉皆盈倦
茲天氣好布穀聲嚶嚶黽勉事東作孰計勞其形浩浩
谷口趣猗猗丈人情竭來應徵辟遠入嵩陽城寫圖想
舊業千里雲煙橫

題劉逸人樂耕卷

明楊士奇

理生雖異業居世皆有務治本既在茲食力余所慕九
扈春始鳴興言向田野初來正溝塍爰方藝禾黍雖有

耕耨勞三時且甘雨歲功聿已成屢豐報田祖儲峙何
必多取具充寒暑有酒可同歡時時會鄰父既醉去悠
然登高睇平楚一為擊壤謠游心緬千古

樂農卷

明陳振

負郭生涯數畝田朝耕暮息興悠然門無胥吏催租稅
囊有兒孫趨社錢厨下晨炊翻白雪牀頭春釀瀉紅泉
清時不是龐公隱鼓腹長歌大有年

書耕卷

明王恭

石田新雨苔花碧禾黍秋香百餘石誰教釀作甕頭春
醉裏看山了殘帙讀書何必問時清縱有荒年莫廢耕
鹿門精舍青山裏春去秋來無宦情

濯隴圖

明
李廷儀

濯隴雨晴春水生人人驅犢隴頭耕太平不在笙歌裡
只聽前邨打稻聲

村田圖雜詠

明
蔣冕

茅舍新蠶作繭遲鄰家桑柘盡空枝持筐欲向街頭買

更恐豪門索舊絲

村田景

明 蔣冕

圈豕登盤酒滿壺
高堂紅燭瑞煙敷
里巫唱罷攔門曲
新婦升堂拜舅姑

趙千里田家四季圖

二首

明 僧西白

桃花浪已深楊柳風猶弱
鄰曲欣往來逢迎勸耕作
健犢不自暇老農良有託
共醉社日尊陶然得真樂

蠶事方告成鳴蜩有新聲
插秧雨初遍治草日不停
雜

坐高樹陰解衣午風清作勞時自逸孰謂非常情

題申之寄示春郊畫軸

宋樓鑰

郊原煦煦春意足細草淒迷芳樹綠鴈鷺無數泛陂塘
牛羊相與隨芻牧幾年不泛浙西船恍如蘇臺俯平川
閒人憂國無他策但願好雨成豐年

里社圖 二首

元劉因

薄賦輕徭復有秋天恩帝力為誰優老盆醉殺邨夫子
盡道今年好社頭

亂後疲民氣未蘇，荒煙破屋半榛蕪。
平生心事羲皇上，回首相看是畫圖。

次韻玉堂畫壁

元表 楠

至人悟窮達，斂跡寓壟畝。
良苗貴深扶，掘土戒蒿蕪。
靄新陽，浮高下，接紫宙，跨犢東南行。
問事一俯首，新雨瀉溝塍。
交流媚川后，輟耕非素心。
帝命資左右，相彼前山雲。
倏迷復還岫，卷舒樂槃澗。
署筆寫其舊，清秋映空谷。
風雨百神守，夙昔經濟姿。
志不在杯酒，要使風俗淳。

斯民樂仁壽

跋豐稔還鄉圖

元王惲

廟堂真宰拜姚崇
斗米三錢四海同
今日太平應有象
畫家消息恐難工

題石恪畫機織圖

宋黃庭堅

荷鉏郎在田行餉
兒未返終日弄鳴機
恤緯不思遠

題樓攻媿織圖

三首

元虞集

鄉里蠶桑勿失時
畫圖勸相又題詩
當時補衮應無缺

金玉餘音到繭絲

吳越蠶桑用日多
始終吟詠極婆娑
玉成繭館閑琴瑟
宜薦房中備樂歌

昔者東南杼柚空
詠歌蠶織到圖窮
勸農十道先齊魯
百世興王衣被功

題紡織圖

元王暉

三晉遺黎樂土農
綵紵為業畧相同
細思七月豳風詠
不到春坊錦繡功

紡績圖

元 貢奎

婦姑紡績夜闌時
月落車寒手轉遲
應媿西鄰歌舞散
酒酣春夢繞深帷

蠶桑圖

元 吳師道

詩圖草木蟲與魚
就中寫出豳風圖
忠臣方寸寓物色
欲使目擊知艱虞
公宮親蠶古遺制
手捋青青有風戾
四海枝條雨露春
萬家機杼升平世
誰知後有歌舞荒
裁雲剪鳳金煌煌
歲輸下了一日費
紅女夜泣寒無裳

畫師此意誰能識不寫尋常奇麗質數葉娟娟即諫書
品目人間當第一

題錢舜舉畫蠶桑圖

明 虞 堪

桑中鳴禽巧如鳩吳孃養蠶夜不歇煖雨寒風惱殺人
正是江南三四月苕溪遺老白髮翁畫蠶畫葉搖春風
千金難買吳孃笑故寫生枝椹子紅

題丹陽賀氏採桑飼蠶圖

明 俞 泰

一從西陵浴蠶始開我萬世資生原五畝牆邊樹桑柘

衣裳乃服由軒轅王澤寢衰不下究棄置田廬作園圃
閭閻無復採桑人却欲重重被文繡吁嗟皇妃躬祀夫
人縲豈故惡逸為勤勞公桑蠶室古來重里罰有布懲
不毛宗陽拔茶易桑植垂崖卓有先幾識四野陰稠桑
作林襄城歌舞忠宣德上有作者民斯從三吳非復當
時風一花一木務珍玩飼蠶樹老煙蕪叢茲圖宛然含
諷意彷彿東郊勸蠶事桑陰筐篋去復來屋裏婦姑忙
不寐簇箔層層候起眠窰繅絲說去年却歎官租猶

未了莫教重貢八蠶綿

題韓晉公邨田歌舞圖後

宋文彥博

治世舒長日田家事力蘇干戈久不識簫鼓共為娛
濁酒行無算酡顏倒更扶將求太平象此是太平圖

次韻和文潞公題韓晉公村田歌舞圖後

宋韓琦

升平胡可狀歌舞入樵蘇歲美人皆樂朝和野共娛
心休無事擾本固絕顛扶我願明時治長如此畫圖

題申季山家所藏李伯時畫村田樂圖

宋戴復古

春秧夏苗秋遂穫官賦私逋都了却雞豚社酒賽豐年
醉唱村歌舞村樂鼓笛有聲無曲譜布衫顛倒傴僂舞
欲識太平真氣象試看此畫有佳趣管絃聲按宮商發
細轉柳腰花十八羅幃繡幙拂香風九醞葡萄金盞滑
王孫公子巧歡娛勿將富貴笑田夫非渠耕稼飽君腹
問有黃金可樂無

題村田樂圖

元虞集

尺素自是高唐物
瑩如秋水宜設色
何人畫此畎畝閑
二三老人若相識
茅屋蕭條古樹下
農務未殷牛在野
或憐鸚鵡脫籠繫
或弄獼猴笑真假
老翁政自如兒嬉
高髻襁負相扶持
古時粉社祀田祖
移饌高亭隨所宜
抱甕初來未貯酒
亦有生鶯宛延首
村優競攜樂具至
犬怪雞驚兒拍手
拄杖出門欣見賓
雜花滿庭生好春
歲時無事得如此
擊壤何必非堯民
騎驢過橋殊矍鑠

攜具荒陂來赴約定知張果千歲人遊戲人間共杯酌

題邨田樂圖

元謝應芳

老人邨老瓦盆嘗作雞豚社不識州縣門阿翁醉倒阿
婆笑膝上咿啞弄乳孫

題富好禮所畜村樂圖

明劉基

我昔住在南山頭連山下帶清溪幽山巔出泉宜種稻
繞屋盡是良田疇家家種田恥商販有足嬾踏縣與州
西風八月淋潦盡稻穗擲比無蝗蟲黃雞長大白鴨重

瓦甕琥珀香新筍芋魁如拳栗殼赤獻罷地主還相酬
東鄰西舍迭賓主老幼合坐意綢繆山花野葉插巾帽
竹箸漆碗兼磁甌酒酣大笑雜語詭跪拜交錯禮數稠
或起頓足舞侏儒或起拍手歌甌篋傾盆倒榼混醃醬
爛漫霑漬方未休兒童跳躍坐喧譟執遁逐走同俘囚
出門不記舍前路顛倒扶掖迷去留朝陽照屋且熟睡
官府亦簡少所求寧知宴安含酖毒耒耜一變成戈矛
高門大宅化灰燼蓬蒿瓦礫塞道周春燕營巢在林木

深山露宿隨猿猴三年避亂客異縣側身天地如浮漚
親朋阻隔童僕散疏食水飲不自謀有時惆恍夢閭里
驚覺五內攢百憂君家畫圖稱絕妙鑒別曾遇柯丹丘
想應臨捐出秘府筆意精到世罕儔邛歌社舞自真率
何用廣樂張公侯太平氣象忽在眼令我感愴涕淚流
近者鄉人來報喜今歲高下俱有秋豺狼食飽臥窟穴
軍師已運招安籌人情自古共懷土况乃霜雨淒松楸
神龜且被豫且困予所勿念天我尤積薪厝火非遠計

誰能獻納陳嘉猷長江波浪接淮泗白日慘澹騰蛟蚪
天下農夫總供給隴畝不得安鋤耰市中食物貴百倍
一豕之價過於牛魚鹽菜果悉買米官幣束閣若贅瘤
朝餐僅了愁夕膳誰復有酒澆其喉循環天運往必復
邪氣暫至不遠瘳此生此景須再覩引領悵望心悠悠

田家留客圖

為四明錙師
向先生賦

元納新

客來田家當六月主人相留樹邊歇呼兒牽馬飲清泉
廚裏新漿解君熱郎君出城幾日前城中米價今幾錢

昨夜南村三尺雨，不知還到城濠邊。
勿厭儂家茅屋小，棘門新編土牆繞。
明朝早飯莫匆匆，雞鳴送君出官道。

邨社醉歸圖

元陳旅

溪村綠雨添新漲，簫鼓青林谷神貺。
春風里社太平民，身世華胥牛背上。

題李唐村社醉歸圖

元朱德潤

村南村北賽田祖，夾岸綠楊聞社鼓。
醉翁晚跨犇牛歸，老婦倚門兒引路。
信知擊壤自堯民，季世龔黃不如古。

披圖昨日過水南縣吏科徭日旁午

田家慶壽圖

明高啓

花滿茅堂映綵衣
開門曉放鶴雛飛
鄰翁壽畢共扶醉
恰似春來社飲歸

題田家娶婦圖

明程敏政

逕草如煙柳如幕
日上茅簷鼓聲作
田翁遣女不出村
東舍西鄰隔墟落
新婦駕牛兒跨驢
家人後擁翁前驅
兒家舉酒攔道勸
甥舅百世同桑榆
耳邊阿婆私屬父

肩上嬌嬰肯離祖
祖歡聲一路到柴關
野伶山歌柘枝舞
兩門彷彿朱與陳
鄉儀簡古民風淳
華筵酒肆設珠翠
想見紛紛京洛塵
婦盃男耕罷征戍
安得移家箇中住
長因擊節頌豐年
不作催科打門句

御定歷代題畫詩類卷六十九

欽定四庫全書蒼要

御定歷代題畫詩類卷七十目錄

牧養類

書鼂說之考牧圖後

宋蘇軾

伯時彭蠡春牧圖

宋黃庭堅

李唐春牧圖

元任士林

題放牧圖

元丁立四首

題耕牧圖

元鄭允端

題韓幹野牧圖

明張鳳翼

題竹石牧牛

宋黃庭堅

題牧牛圖

宋陳與義

張世傑經歷牧牛圖

金段成已

題牧牛扇頭

金趙秉文

風柳牧牛畫冊

元劉因

牧牛圖

元王惲五首

韓滉牧牛圖

元程鉅夫

題牧牛圖 元吳澄

題牧牛圖 元陳旅

題牧牛圖 元張翥

題牧牛渡水圖 元貢師泰

題牧牛圖 元黃清老

題牧牛圖 元丁復

題牧牛圖 元貢性之

牧牛圖 元王良臣

牧牛圖 元田錫

題李唐牧牛圖 元鄭東

題牧牛圖 元釋恕中

題牧牛圖 明張以寧二首

牧牛圖 明錢宰

題牧牛圖 明林鴻

牧牛圖 明解縉

牧牛圖 明金幼孜四首

題李唐牧牛圖 明劉崧二首

題牧牛圖 明倪敬

題牧牛圖 明錢仲益

牧牛圖 明陳輝

秋山牧牛圖 明廖道南

牧牛圖 明廖道南

牧牛圖 明吳希賢

題牧牛圖 明林廷謨

牧牛圖

明林景清

牧牛圖

明黃榮

牧牛圖

明闕名

題老翁騎牛圖

明劉基

題野老醉騎牛圖

明錢宰

宋徽宗耕牛圖

明楊榮

題趙君發牧羊圖

宋韓駒

跋燕肅牧羊圖

元王惲二首

牧羊圖

元袁桶三首

胡人牧羊圖

明尹耕

題劉光朝歸牧圖

元陳泰

題風雨歸牧圖

元錢惟善二首

青郊歸牧圖

明李廷儀

題畫牧

明王恭

題畫

明岳岱

經進鹽圖詩

明彭韶八首附錄

--	--	--	--	--	--	--	--	--

欽定四庫全書薈要卷一萬九千二百七十八

集部

御定歷代題畫詩類卷七十

牧養類

書鼃說之考牧圖後

宋蘇軾

我昔在山間但知羊與牛
川平牛背穩如駕百斛舟
舟行無人岸自移我臥讀書牛不知
前有百尾羊聽我鞭聲如鼓鼙
我鞭不妄發視其後者而鞭之
澤中草木長草長病牛羊尋山跨坑谷
騰趨筋骨強煙簑雨笠長林

下老去而今空見畫世間馬耳射東風悔不長作多牛翁

伯時彭蠡春牧圖

宋黃庭堅

洛陽樓上春已歸湖中鴻鴈拍波飛布帆天闊隨鳥道
石林風晚吹人衣春水初生及馬腹浮灘欲上西山麓
遙看絕嶺秀雲松上有垂蘿暗溪谷沙眠草啣性不驕
側身注目鳴相招林間瞥過星爍爍原上獨立風蕭蕭
君不見中原真種未沉沒南行市骨何倉卒祇收力健

載征夫肯向時危辨奇骨即今貢馬西北來東西坊監
屯雲開紛然駑驥同一秣爾可不憂四蹄脫

李唐春牧圖

元
任士林

春氣薰人未耕作江草青青牛齒白牛飢草細隨意嚼
老翁曲膝睡亦著蓬頭不記笠拋却午樹當風夢搖落
夢裏牛繩猶在握昨夜囹頭牛食薄

題放牧圖

四首

元
丁立

村鼓誰家樂社神雨餘草木盡知春催科未動甍桑了

此是山中放牧人

前山後山山鳥啼溪南溪北草離離秧田已足三時雨
此是山中放牧時

楓林日落山徑微暝色欲合行人稀東家稚子候簷隙
此是山中放牧歸

隔浦晚煙迷遠樹滿川春雨長平蕪數家茅屋疎林外
此是山中放牧圖

題耕牧圖

元 鄭氏
名允 端

幽人薄世味耕牧山之陰自抱村野姿常懷畎畝心行
行南山歌落落梁父吟挂書牛上角揮鋤瓦中金飽飯
黃昏後力田春雲深四體勤樹藝三生悟浮沉巢父世
高尚德公所欽伊人去已遠高風邈難尋撫卷空歎
息俯仰成古今

題韓幹野牧圖

明
張鳳翼

渥洼水草正當時天許蘭筋野牧宜未過王良應棄老
難逢伯樂敢稱奇偶然赭白曾題賦豈必驪黃始入詩

千載獨憐韓幹筆不教巖穴肖胥靡

題竹石牧牛

宋 黃庭堅

野次小崢嶸幽篁相依綠阿童三尺箠御此老叡鯨石
吾甚愛之勿遣牛礪角牛礪角尚可牛鬪殘我竹

題牧牛圖

宋 陳與義

千里煙草綠連山雨新足老牛抱朝飢向山影覈鯨犢
兒狂走先過浦却立長鳴待其母母兮為人實倉廩汝
飽不慙人媿汝牧童生來日日娛只愁身大常把鋤日

斜睡足牛背上不信人間有黃輿

張世傑經歷牧牛圖

金段成已

綠陰深處戲童兒牛自東西兒不知休說兒狂無伎倆
人間何事不兒嬉

題牧牛扇頭

金趙秉文

一牛顧其犢一牛軒尻睂傍有牧犢子窺巢攀樹枝嗟
爾有餉具不念鴉雛飢烏鳥各天性飛來護其兒汝親
亦念汝而人獨不知不如兩相忘人禽兩娛嬉

風柳牧牛畫冊

元劉因

遠意昇平畫不勝牛邊煙樹渺層層
前頭恐有桃林路百喚溪童不解應

牧牛圖

五首

元王惲

垂紉徐行信自如一揮鞭策見齊驅
近來不似圖中看早塊敲蹄百草枯

青青草滿郊原放飽歸時不用牽
何似人牛俱不見碧天明月靜娟娟

綠楊堤岸曉風清
碧草陂塘暮雨晴
村落近年乾旱損
却將圖畫看昇平

兩童相顧意何為
猶恐渠飢趁草歸
一道牧民無所事
處心專在當家肥

飽耕飢放事年年
放去收來任自然
莫訝兩童無所識
至今牛背是堯天

韓滉牧牛圖

元程鉅夫

農為天下本萬世此心同
晴日開圖畫方知宰相功

題牧牛圖

元 吳澄

樹葉醉霜秋草萎
童驅馱棘涉淺溪
一牛先登舐犢背
犢毛濕濕猶未晞
一牛四蹠俱在水
引脰前望喜近堤
一牛兩脚初下水
尻高未舉後兩蹠
前牛已濟伺同隊
回身向後立不移
一牛將濟一未濟
直須並濟同時歸
此牛如人有恩義
人不如牛多有之
不如牛多有之
笑問二童知不知

題牧牛圖

元 陳旅

水樹春深藏野屋歸鴉飛盡夕陽川誰知天上黃姑渚
只在南山白石邊

題牧牛圖

元張翥

去年苦旱蹠敲塊今年水多深沒鼻爾牛轂棘耕得田
水旱無情力皆廢畫中見此東臯春牧兒招搖犢子馴
手持鷓鴣坐牛背風柳煙蒲愁殺人兒長犢壯須盡力
豈惜辛勤供稼穡縱然喘死死即休不願徵求到筋骨

題牧牛渡水圖

元貢師泰

兒騎牛兒騎牛兩牛渡水當中流一牛帶犢臨沙洲沙
洲泥深沒牛足中流浪高拍牛腹長繩墜手衣裹身前
者起顧後俯伏牛背敬傾不自由誰云穩比萬斛舟待兒
出險走平地畫圖忽落東海頭東海頭飯牛之子曾封侯

題牧牛圖

元黃清老

平原雨多煙草浮牧童驅牛如挽舟柴門正在水深處
青山流過屋西頭

題牧牛圖

元丁復

邈爾三尺童御此兩轂
鯨春風笠底回前村
燒痕綠

牧牛圖

元 貢性之

溪童飲牛渡溪水牛過水深行復止
人知水深牛不行誰識回頭顧其子
桃林之野春雨晴燒痕回綠春草青
太守勸農當二月土膏肥煖牛可耕
邯鄲城頭征戰息甯戚徒勞吟白石
一聲笛裏太平歌牛背溪童自朝夕

牧牛圖

元 王良臣

三摩不受一塵侵本分功夫日念深
杖屨得迴遊子脚

葛藤灰盡老婆心顛狂不作風頭絮出入誰傷井底金
迴首人牛在何許一江明月夜沉沉

牧牛圖

元 田 錫

干戈擾擾遍中州挽粟車行似水流何日承平如畫裏
短蓑長笛一川秋

題李唐牧牛圖

元 鄭 東

羨殺田翁不出村牛羣坡上散如雲買牛何日同渠牧
短笛時吹向樹根

題牧牛圖

元 釋恕中

誰家荒曠連平原何處孤村帶喬木
官田耕盡牛正閒
且對東風弄橫玉

題牧牛圖

二首

明 張以寧

返照在高樹歸牛渡層波一犢牟然赴其母
老特反顧
情何多牧兒見之亦心惻人間母子當如何
日莫倚門
烏尾訛

中園有樹葵大田亦多稼牧人急曳牛鼻迴恐爾踐之

鄰父罵何時睡起兩相忘
吹笛西風柳陰下
青山白日秋瀟灑

牧牛圖

明 錢 宰

野老春耕歇溪兒晚牧過
夕陽牛背笛強似飯牛歌

題牧牛圖

明 林 鴻

綠草萋萋黃犢肥
半蓑殘雨臥東陂
煙深野水行人絕
家在寒林月上遲

牧牛圖

明 解 縉

笛聲吹度柳梢風
葉葉晴雲繞翠虹
白石歌闌春雨歇
青山半壓夕陽重
耕犁自足敲仙朮
澗液常教飽嫩菘
文繡不衣金不絡
臥看天宇月明中

牧牛圖

為師尚書
題四首

明金幼孜

日出騎牛去日暮
逐牛歸年豐耕作
好食飽望牛肥
雲谷翠森森冰霜
閱歲深已看能鳳
舞還聽作龍吟
夜雨翻龍箨春風
長鳳稍佇看清廟
薦美韻叶笙匏
逸態謝炎涼貞姿
炯冰玉君子思切
磋無忘詠淇澳

題李唐牧牛圖

二首

明 劉崧

天寒放牛遲野曠風獵獵獨來長林下
吹火燒山葉
日夕山氣昏獨歸愁路遠猶戀草青青
遲回下長阪

題牧牛圖

明 倪敬

既飽原頭草還驅飲澗澍如何子民者
不似牧童心

牧牛圖

明 錢仲益

東皋二月春草生江邊放牛花雨晴
牧兒唱歌牛嚼草
穩坐牛背隨牛行牛角攢攢耳濕濕
斷隴荒陂隨意入

煙蒲風柳不勝情日莫歸來荷蓑笠我本山林牧牛叟
濫著朝衫今白首擬買江南黑牡丹乞取閒身老農畝
牧牛圖
明陳輝
日莫桃林風雨寒數聲長嘯下空山草深行逕無歸路
却望清溪沙上還

秋山牧牛圖

明廖道南

碧寒黯澹雲門陰落葉滿徑虛寒岑憑欄幽眺野空闊
倚樹長嘯秋蕭森石勢參差亂峰出水光明滅迴溪深

春來即擬問牛喘先遣牧童穿遠林

牧牛圖

明 廖道南

扣角平原不記功密林穿石樹舍風邛田誰識春深淺
牛喘應須問相公

牧牛圖

次周鶴洲韻

明 吳希賢

菰蒲深處鳥呼羣溪上蹄涔路不分日莫調禽忘歸去
西山松火暗秋雲

題牧牛圖

明 林廷謨

黃葉岡頭跨犢過
澗泉聲似和清歌
得芻寄語須歸早
日莫寒山猛虎多

牧牛圖

明
林景清

山南碧坡春草香
山下合流春水長
楊柳風前氣蕭爽
原是田家出牧場
牧兒放牛依水草
坐石眠雲情自好
偷閒學得弄山禽
夕陽在山牛亦飽
隔崦茅簷舊世居
朝出煙村莫返閭
牛尾何須縛田火
牛角何曾挂漢書
蓑衣箬笠紅塵表
萬事忘機心不擾
明日公田布穀催

一犁耕趁南村曉

牧牛圖

明黃榮

江草青青江水流
臥吹孤笛弄清秋
放牛莫放南山下
昨日南山虎食牛

牧牛圖

明闕名

海宇昇平賣劍時
漫勞筋力事東菑
林陰沙際多春草
不羨文身太廟犧

題老翁騎牛圖

明劉基

白日上悠悠竹稍霧已收晴天不易得及時當放牛鄰
家放牛多兒童我家無兒只老翁寒衣在機織未就原
上烈烈多高風勿言衰老筋力薄有牛可放殊不惡但
願天公不相惱牛背閒眠飢亦好

題野老醉騎牛圖

明錢宰

村田樂事老來稀記得江南春社時兒女醉扶黃犢背
帽簷顛倒插花枝

宋徽宗耕牛圖

為黃福少保之子題

明楊榮

春原過雨春日熙春樹連陰春草肥田家力耕貴及時
手挽牛兮肩負犁草香泉美牛步遲農心汲汲應何為
上恐公家賦稅虧下慮私門妻子飢吁嗟牛兮胡不知
宣和之初能念茲九重燕暇親寫之驕奢一動萬事隳
塞草黃沙千載悲

題趙君發牧羊圖

宋韓駒

王孫豈識田家趣妙畫聊因好古收唯有野人開卷笑
憶騎牛背下西疇

跋燕肅牧羊圖 二首

元王惲

行飲溪流喜降阿歸鞭影淡夕陽坡似將澌澌維千角
辨作宣王考牧歌

平秩東臯事有餘荒煙平楚散林墟牧人例有繁多慶
蓑底秋江夢衆魚

牧羊圖後有閻先生詩次韻感舊因成二首

元袁桷

嬰兒御氣草堤眠能使雙羊合自然莊叟不知蝴蝶夢

覺來重作養生篇

玉質堂堂地下眠
雲龍風虎各加鞭
松陰舊日趨庭客
整珮蘭皋駐集仙

牧羊圖

元 袁 楠

高柳風清曉日蒼
牧童隨處候陰涼
似憐挾策當年客
物我胷中兩未忘

胡人牧羊圖

明 尹 耕

邊庭四月始知春
沙草初青柳復新
金鑄未須窺漢月

羶帷時亦靜胡塵黃髮小胡花插首腰下寶刀光射肘
日斜驅羝入東林草美泉香誇富有君不見虞廷干羽
兩階陳白雉黃熊入貢頻聖王有道四夷守沙場閒殺
射鵬人

題劉光朝歸牧圖

元陳泰

平湖草綠生春煙斜陽牧豎乘烏犍日光不動牛背穩
後者喘息長繩牽吾兒讀書懶更魯少小嬌癡那似女
微官食祿能幾何歲歲羸駮踏風雨

題風雨歸牧圖 二首

元 錢維善

野陰雲氣合蒼茫
霹靂山精白石藏
蓑笠歸來牛背穩
不迷風雨似尋常

不見人煙聞鬼車
長林昏黑雨如麻
晚晴却看前峰翠
過得溪南即是家

青郊歸牧圖

明 李廷儀

庶草敷榮翠滿墟
夕陽歸牧雨晴初
清時只唱昇平曲
牛角何心挂漢書

題畫牧

明王恭

耕童生小無所知，慣騎牛背度晴陂。
橫吹紫竹無宮調，笑殺五陵遊俠兒。
荒林野水涼蕭瑟，山葉吹霜鳥邊落。
信陵墳上草青青，幾見殘碑礪牛角。

題畫

明岳岱

莫色起郊墟，牛羊識歸路。
牧童無枕簟，但鋪明月臥。

經進鹽圖詩

八首附錄

明彭韶

鹽場圖

兩浙山水鄉古稱天地藏西望出吳淞東行踰鴈蕩利
孔非一塗鹽征為海王泉布充京儲芻糧助邊餉庶哉
用物宏生意不復暢薪桂與炊玉晨昏增感愴敝屋棲
寒蘆新畬倚孤嶂懷土思依依承家如草創

山場圖

山木非不佳林麓非不廌百年生聚繁分業薄如紙朝
夕斧斤入不待黃落矣近代慨山童遠入虞虎兕肩重
何足辭突黔良藉此而况煮海功昏夜無停止道薪苟

不力公私亦何倚歲歲事辛勤猶勝棄桑梓

草蕩圖

海墺咫尺地一望如掌平材木不生植草莽徒敷榮廣
牧良有害泛取亦難成瓜分給亭戶表蕪自經營繁霜
一以降百物俱彫零芻蕘忽萃止艾縛無留行輦運積
官所來歲事煎烹負荷非為苦願言公課登

淋涵圖

旭日朝沮場欣茲風色競錢鑄密如鱗沙塗平似鏡汲

曬足灰泥層層白相映易地聚成堆再淋醎始盛方池
藉以茅小竇暗通阱蓮實重且堅浮浮力能勝祇恐山
雨來一簣功未竟殷勤守餘瀝坐待滷池定

煎鹽圖

鹺液泛清冷牢盆戒修潔分番忽後時及此旺煎月一
勺盡傾瀉萬竈俱焚熟沉沉紅霞收感感晴波竭斂之
白盈箕凝華燦如雪點檢入公私中心更煩熱荆妻慰
苦顏摩挲汗流血却歎戍邊人垂老有離別

徵鹽圖

小汛風日好大汛潮汐平袖長應善舞課羨易為征歲
歎伊誰知寧分雨與晴衣食豈不給國計良非輕擔石
四面至倉庾一朝盈鹽官唱簿厯折閱頻呼聲况乃逃
亡多荒額重加徵展限諒未允努力事餘生

放鹽圖


三邊乏儲峙良賈勞委輸償以權海利子母多贏餘水
膏易消耗部屋難貯諸多年積逋欠折算盡錙銖渺渺

太湖畔盈盈東海隅雪山壓巨浪風帆恣所如每資藜
藿食亦薦王侯厨誰念味中苦搔首空躊躇

追賸圖

窮賸固貧國厚貨亦貧民涵丁有常賦催日何紛紜侵
歲已久黃緣具虛文商算無從給鞭箠不堪聞富黠
自當爾哀此顛連人稱貸不見售絲穀無餘新寬減逢
優恤感激謝皇仁滄海未終竭更始重辛勤

御定歷代題畫詩類卷七十



總校官庶吉士臣侍朝

校對官庶吉士臣陳文樞

謄錄監生臣周燮

欽定四庫全書薈要

集部

御定歷代題畫詩類卷七十二

詳校官原任主事臣李斯咏

欽定四庫全書薈要

御定歷代題畫詩類卷七十一目錄

樹石類

題李尊師松樹障子歌

唐杜甫

觀吳偃畫松

唐施肩吾

畫松

唐元稹

袁德師求畫松

唐劉商

與湛上人畫松

唐劉商



酬道芬寄畫松 唐劉商

山翁持酒相訪以畫松酬之 唐劉商

壁畫古松 唐朱灣

畫松 唐徐夔

李肱所遺畫松書兩紙得四十韻 唐李商隱

畫松 唐僧景雲

題仁上座畫松 宋黃庭堅

呂希道少卿松 宋蘇轍

許道寧松 宋王履道

次韻伯庸畫松十韻 元劉因

趙閒閒畫松和韻 元程鉅夫

羅若川畫松 元虞集

縣厓松圖 元吳鎮

畫松 元貢師泰

畫松 元吳師道

奉題仇工部壁間古松圖歌 元傅若金

題畫松 元傅若金

松障圖歌 元陳泰

題李遵道華頂松 元張天英

題何武子所藏簡天碧松圖 元劉永之

題梅花道人偃松 元鄭洪

松壑單條 元吳鎮

題趙學士松圖 明劉基

題趙文敏公畫松 明劉基

次韻畫松 明陶安二首

題畫松 明劉崧

題費同知松樹幃子 明楊士奇

古松圖 明金幼孜

題畫松 明李進

題松 明何喬新

題劉鑑松 明陳憲章

戲題張千戶畫松 明陳憲章

題松 明丘濬

畫松 明李東陽二首

題邵容城所藏幽松圖 明李東陽

題畫松 明胡閔

畫松 明沈周

題松卷 明沈周

張子俊畫松 明吳寬

題畫松 明杭淮

畫松卷次韻

明周用

題楊司徒古松障子

明顧璘

題羅侍御所藏周必都古松障

明顧璘

題半塘寺潤公房顧叔明所畫松壁

明孫寧

巨然松吟萬壑圖

元元好問

題洞陽徐真人萬壑松風圖

元趙孟頫

自畫萬壑松風圖

明虞堪

題丁氏松澗圖

元鄧文原

題簡生畫澗松 元虞集

題松澗圖 元陳樵

古澗長松圖 元吳鎮

題王起宗畫松巖圖 元楊載

松泉圖 元郭翼

松路山巖圖 明徐賁

題松溪圖 明吳溥

壑松圖 明李日華二首

欽定四庫全書薈要卷一萬九千一百七十九

集部

御定歷代題畫詩類卷七十一

樹石類

題李尊師松樹障子歌

唐 杜甫

老夫清晨梳白頭
玄都道士來相訪
握髮一作呼兒延

入戶手提新畫青松障
障子松林靜杳冥
憑軒忽若無

丹青陰崖却承霜雪一作露
幹偃蓋反走虬龍形
老夫平

生好奇古對此興與精靈聚
已知仙客意相親
更覺良

工心獨苦松下丈人巾屨同偶坐似一作自是商山翁
悵望聊歌紫芝曲時危慘淡來悲風

觀吳偃畫松

唐
施肩吾

君有絕藝終身寶方寸巧心通萬造忽然寫出澗底松
筆下看看一枝老

畫松

唐
元稹

張璪畫古松往往得神骨翠帚掃春風枯龍夏寒月流
傳畫師輩竒能盡埋沒纖枝無瀟灑頑幹空突兀乃悟

埃塵心難狀煙霄質我去浙陽山深山看真物

袁德師求畫松

并序

唐劉商

武元衡云商酷尚山水著文之外妙極丹青好事
君子或持冰素越淮湖求一松一石片雲孤鶴獲
者寶之雖楚璧南金不之過也故集中求畫之詩
為多

柏偃松啟勢自分森梢古意出浮雲如今眼暗畫不得
舊有三株持贈君

與湛上人畫松

唐劉商

水墨乍成巖下樹
摧殘半隱洞中雲
猷公曾住天台寺
陰雨猿聲何處聞

酬道芬寄畫松

唐劉商

聞道松華學沈寧
寒枝浙瀝葉青青
一株將比囊中樹
若箇年多有茯苓

山翁持酒相訪以畫松酬之

唐劉商

白社風霜驚暮年
銅瓶桑落慰秋天
憐君意厚留新畫

不著松枝當酒錢

壁畫古松

唐朱灣

石上盤古根謂言天生朽安知草木性變在畫師手陰
深方丈間真趣幽且閑木文離披勢搓粹中裂空心火
燒出埽成三寸五寸枝便作千年萬年物莓苔濃淡意
不同一半死皮藏蠹蟲風霜未必來到此氣色杳似寒
山中孤標可翫不可取能使支公道場古

畫松

唐徐夔

澗底陰森驗筆精
筆間開展覺神清
曾當月照還無影
若許風吹合有聲
枝偃只應玄鶴識
根深宜與茯苓生
天台道士頻來見
說似株株倚赤城

李肱所遺畫松書兩紙得四十韻

唐

李商隱

萬草已涼露開圖
披古松青山徧滄海
此樹生何峰孤
根邈無倚直立撐鴻濛
端如君子身挺如壯士
曾膠枝
勢夭矯忽欲蟠
挐空又如驚螭走
默與奔雲逢
孫枝擢
細葉旖旎狐裘茸
鄒顛蓍髮軟麗姬眉黛濃
視久眩目

晴倏忽變輝容竦削正稠直婀娜旋敷

一作數

峯又如洞

房冷翠被張穹籠亦若暨蘿女平旦妝顏容細疑襲氣

母猛若爭神功燕雀固寂寂霧露常衝衝香蘭媿傷暮

碧竹慙空中可集呈瑞鳳堪藏行雨龍淮山桂偃蹇蜀

郡桑重童枝條

一作修

亮杪脫靈氣何由同昔聞咸陽帝

近說嵇山儂或著仙

一作佳

人號或以大夫封終南與清

一作青都煙雨遙相通安知夜夜意不起西南風美人昔

清興重之猶月鐘寶筭十八九香緹千萬重一旦鬼瞰

室稠疊張纍量赤羽中要害是非皆匆匆生如碧海月
死踐霜郊蓬平生握中玩散失隨奴僮我聞照妖鏡及
與神劍鋒寓身會有地不為凡物蒙伊人秉茲圖顧盼
擇所從而我何為者開懷捧靈蹤報以漆鳴琴懸之真
珠櫳是時方暑夏座內若嚴冬憶昔謝四騎學仙玉陽
東千株盡若此路入瓊瑤宮口詠玄雲歌手把金芙蓉
濃藹深霓袖色映琅玕中悲哉墮世網去之若遺弓形
魄天壇上海日高瞳瞳終騎紫鸞歸持寄扶桑翁

畫松

唐僧景雲

畫松一似真松樹且待尋思記得無曾在天台山上見
石橋南畔第三株

題仁上座畫松

宋黃庭堅

偃蹇松枝隔煙雨知儂定是歲寒材百年根節要老硬
將恐崩崖倒石來

呂希道少卿松

宋蘇轍

溪回山石間蒼松立四五水深不可涉上有橫橋渡溪

外無居人盤石平可住縱橫遠山出隱見雲日莫下有
四老人對局不回顧石泉雜風松入耳如暴雨不聞世
人喧自得山中趣何人昔相遇圖畫入紈素塵埃依古
壁永日奉樽俎隱居畏人知好事竟相誤我來再三嘆
空有飛鴻慕逝將從之遊不惜爛樵斧

許道寧松

宋
王履道

玉骨嶙峋雪作頂清溪下舞蛟龍影忽驚發地扶屋極
誰向天公乞刀尺道人逸氣天雲高韋偃畢宏皆坐超

奔崖斷壑得睥睨悲風激激星勞勞胡為乎挂脚高堂
之素壁許侯筆與萬牛敵坐來一氣回霜秋四顧滿堂
皆古色老夫卜築寄雲松屢揖伯鸞攜敬通忽見婆婆
眼中物使我嚼句生天風千章竒材臥澗底公獨區區
悅其偽我知金石貫冰霜便與髯卿同一味君不見丹
霞大士燒木佛此老曾中果何物

次韻伯庸畫松十韻

元劉因

妙思通靈素玄陰接帝青抗顏躬蹇蹇蒙頂髮星星颯

爽龍羞豸蕭疎鶴鍊形壁虛生地籟斗近界天經蝶夢
春濤湧蟲疑曉日冥雲生停竿候風入倚窗聽屈曲車
連軫騰竿筴列庭戀鄉思海岱封爵鄙云亭月落孫生
嘯天寒屈子醒雄姿輕虎豹浮蹟陋鷗鵲

趙閑閑畫松和韻

元 程鉅夫

辭華推哲匠才大古云難如許明堂具偏宜畫裏看

羅若川畫松

元 虞 集

暮春多雨晝冥冥羅生畫松當素屏老蛟化為劍氣黑

白鶴下啄苔痕青傳來日暮自篝火夢入幽巖尋茯苓
不遇胡僧露雙脚石函自了讀殘經

縣崖松圖

元 吳鎮

偃蹇支離不耐秋搖風灑雨幾時休轉身便是青山頂
又有懸厓在上頭

畫松

元 貢師泰

蒼龍蛻骨東海上太陰黯淡垂高空六丁驅起夜行雨
萬里不斷蓬萊風

畫松

元 吳師道

風霜不改色水石淡為鄰祇合空山老豈知人世春

奉題仇工部壁間古松圖歌

元 傅若金

蒼松在山自竒古灌木翳之人不驚忽然圖向堂上壁
滿座嘆息長風生交柯岨走森晝晦其下將疑鬼神會
霧雨寒霏虎豹毛雷霆怒折蛟鼉背乃知巨筆老且神
力斡造化雄千鈞皇天不天棟梁具后土潛回霜雪春
爾松已為人愛惜見爾為爾生顏色山中豈無材木倚

絕壁未逢匠石嗟何益

題畫松

元 傅若金

遙憶商顏松色青
女蘿枝上醉眠醒
自從四皓安劉後
歲莫何人采茯苓

松障圖歌

元 陳 泰

何人獨立身堂堂
十八公子鬚髯蒼
凝冰不遣勢摧折
清籟時與髣低昂
蘭為允兮雪為友
燕坐松間自呼酒
眼花耳熱鱗鬣生
千尺龍蛇入揮手
手中松月自離筆

已見雲煙生蒼鬱儻非白晝堂宇空真恐幽陰鬼神出
平生始識顏平原艱苦絕勝甜中邊世間畫史千金價
惜哉此松不多畫

題李遵道華頂松

元 張天英

蒼髯鐵爪欲飛揚肯與人家作棟梁記得石橋明月夜
一溪龍影茯苓香

題何武子所藏簡天碧松圖

元 劉永之

蒼松偃蹇如短虬垂肘近人寒不收悲風蕭蕭生晝晦

古鬢彫水令人愁錦韉騎馬山陰道石黛空青拂衣好
萬里江湖隔舊游坐觀圖畫空山老

題梅花道人偃松

元鄭洪

墨池帽脫管城子壁府罄折徂徠公玉關金鎖掣玄豹
銅臺瑤柱蟠蒼龍星霜鬢眉遽如許鐵石肝膽將誰同
大夫受命當偃偻天子法駕行東封

松壑單條

元吳鎮

虬枝鐵幹撐青空飛泉絕壁鳴琤琮幽人洗耳坐其下

風來謾謾如笙鏞

題趙學士松圖

明 劉基

趙公拈筆作古松平地躍出三青龍蜿蜒不上霄漢去
爽颯長留煙雨濃前朝美人鬪草處猶有當時數株樹
江亭六月涼如秋應與此圖相對愁

題趙文敏公畫松

明 劉基

吳興昔王孫能畫世莫及觀其二松圖矯若龍出壑蟠
根破坤輿拔萃滙原隰交加各軒翥前芳相倚立龜鱗

撐空青豕鬣振颯飄高藏日月氣清滴雲霧汁垂釣者
何人短棹非妄集五湖多風濤蛟蜃頭角輯不如滂澤
間取足鱗與縵倦眠松影下百竅清涼入慎勿驚松枝
天寒衣袂濕

次韻畫松 二首

明陶安

鐵幹宛如韋偃筆誤令工匠施刀尺陰森黛色千古深
鬚髯霜痕半天濕猿鶴清音恍在庭龍虎白骨堅如石
從知能事不易成畫水猶云日踰十

蒼標當入凌煙筆相去青天不盈尺獨持勁節冬雪寒
長帶恩光朝露濕迴枝忽變老蛟形託根不向懸崖石
按圖必求如此材待構明堂價增十

題畫松

明
劉崧

巫峽荆門不可尋坐憐孤嶂動雲林夜寒或與蛟龍鬪
秋暝應聞虎豹吟千歲茯苓山下老一時絲蔓雨中深
野橋寂寞雲根冷最憶停驂弄晚陰

題費同知松樹幃子

明
楊士奇

當代畫松誰最精王紱卓迪俱馳聲兩生以來鮮繼者
鳳池周濬新得名此圖筆有千鈞力全幅剡藤間潑墨
雙株奮起如雙蚪直氣森森勢千尺樛枝屈鐵蟠穹蒼
勁節磊砢鱗甲張長風颯颯動滿座六月清晝高堂涼
吉安別駕好奇古對此宛然巖壑趣茯苓琥珀焉足奇
堅操終懷共遲暮別駕別駕臨安彥浙東山東宦游徧
四明徂徠千歲植所歷山林屢嘗見大材之成由化工
自古匠輪希得逢明堂清廟選梁柱何限空老深山中

古松圖

明
金幼孜

十畝繁陰欲破空
當時曾受大夫封
廟廊正爾需梁棟
未許終容大壑中

題畫松

明
李進

君不見靈隱山前小朶峰
入山九里皆青松
怒濤翻空捲江海
高枝挂石蟠虯龍
西湖三月春意濃
錦囊駿馬呼奚童
清陰夾道生爽氣
金粉撲面香濛濛
兩年不踏湖頭路
轉眼春來又春暮
畫中忽見一株松
髣髴山前

幽絕處幽絕之處多仙靈吾獨何為縛塵纓寄謝仙靈
許同隱準擬長鏡尋茯苓

題松

明
何喬新

虬枝天矯翠參天雨榦霜皮老更堅
榱桷年來收拾盡
豈知梁棟在山巔

題劉鑑松

明
陳憲章

劉生於寫松能以酒力遣酩酊氣正豪
蒼龍自舒卷

戲題張千戶畫松

明
陳憲章

張侯畫松人不識松不畫橫惟畫直上干青霄下盤石
倒卷蒼龍二千尺神物安可留屋壁變化虛空了無迹
不然恐遭雷斧劈左手執弓右持戟取勝無過萬人敵
侯莫畫松費筆力

題松

明丘濬

蒼龍拏雲欲上天鱗甲飛動頭斬然碧風吹海翠濤湧
笙簫一派空中懸深山大壑無人到琥珀埋光兔絲槁
家家束葦作屋楹未必長林此中老

畫松

為卜刑部
從大題

明
李東陽

玄雲匝地黯無輝
老幹盤空勢不歸
疑是葉家堂上見
夜深風雨墨龍飛

畫松

為顧良弼
主事題

明
李東陽

畫松不必真似松
風骨略與畫馬同
畢宏曹霸兩奇絕
妙意止在阿堵中
君家素壁光如雪
上有虬枝老垂鐵
晚歲長同怪石寒
炎天恥受高雲熱
江翻樹轉爭喧
逐十步九戰何時開
陰房半局山鬼嘯
海水不斷天風來

城南野人頗醇古坐愛涼秋滿虛宇安得移來十丈青
高價如山棄如土知君此興迴莫攀謂予苦絆風塵間
攜琴載鶴招使去我家自有徂徠山

題邵容城所藏幽松圖

明李東陽

種松谿邊長十丈高雲對屋圍青障中有幽人愛讀書
芋袍紗帽秋蕭爽青苔白石坐移時衡門晏起獨開遲
山中繁實雨初落水面垂蘿風倒吹十年南北江湖夢
野樹孤雲遞迎送此地材同新甫良居官多比藍田重

酌君美酒聽我歌東園桃花能幾何丈夫功業在晚節
君今尚壯非蹉跎

題畫松

明胡閏

幽人無俗懷寫此蒼龍骨九天風雨來飛騰作神物

畫松

明沈周

老夫慣與松傳神夾山倚礪將逼真青雲軋天見高蓋
蒼鱗裊煙呈古身我亦不知松在紙松亦不知我戲耳
吹燈照影蛟起舞直欲排空掉長尾待松十丈歲須千

老夫何壽與作緣不如筆栽墨培出一笑何問人間大
小年

題松卷

明沈周

寸莖悠悠至千丈歲月之後乃可望老夫一日春雨中
手緩心閒筆初放徂徠合抱三百株生捉龍蛇眠紙上
培之以墨土何功根葉不驚神亦王傍人為我奪造化
畢宏韋偃仍相誑一舒一卷風雨生滿堂錯愕空相向
還疑秋子打牕扉亦覺春花撲屏幃久無采錄我何嗔

自倚胸中意為匠

張子俊畫松

明 吳 寬

案頭佳楮不盈尺，上有千丈之長松。非關月落影如許，
連蠶欲起雙蛟龍。我方隱几當清晝，彷彿徂徠見深秀。
空堂颯颯風聲寒，滿把稜稜霜骨瘦。昔聞張卿人品高，
王芾與之稱二豪。鳳池揮灑出天趣，往往筆底翻波濤。
杜陵詩翁去我遠，愧此畢宏與韋偃。故園舊種陰已成，
獨客燕山歲華晚。

題畫松

明 杭 淮

登堂忽訝生煙雲錯落長松偃東壁老幹半作虬龍形
枝葉長留歲寒色古來畫者有韋偃近時廷章亦可師
但留一榦在人世已覺澗壑無餘姿更添白石相撐倚
日照蒼苔淨泥滓摩娑不覺毛髮寒五月高堂朔風起

畫松卷次韻

明 周 用

舊時吾鄉石田丈文彩風流屬人望畫松不獨能擅場
寸莖之作兼豪放梓堂石田善摹搨輞川未必居其上

何哉畫史亟畫松太昊初以木德王毫端吐吐皆逼人
百金一筆那相誑密雲不見羣龍首淵躍天飛惟所向
凍雷夜半驚霹靂珍重十幅生絲障誰將獻卜構明堂
操斧按圖煩大匠

題楊司徒古松障子

明顧璘

昨從山中還草堂入門雲霧迷日光問之驚怪胡致此
司徒畫障懸東牆幾株古樹形突兀老龍怒立當我屋
泰山東巖五大夫參天氣勢無卷曲雪柯霜幹當夏清

耳邊謾謾風濤聲儼然丘壑在左右始信妙畫通神明
司徒應詔天上來捲簾清晝坐高齋不須把玩山林趣
正爾相資梁棟材

題羅侍御所藏周必都古松障

明顧璘

昔年我登柱史堂古松畫障何昂藏
膠枝崢嶸豸角勁霜皮錯落龍鱗蒼
不知墨榦凡幾尺氣勢直欲凌雲長
移牀盤桓坐其下六月不熱迴清涼
畢宏韋偃骨已朽乃有周老傳芬芳
祇疑畫手太奇崛人間無此真棟梁

昨經南湘湘水曲夾道萬株俱突兀根老居人忘歲年
陰深過客逃炎燠郡齋正當蒼翠中三歲捲簾看不足
鸛鶴秋棲不敢定猿猱夜度愁還哭有時枕書相對眠
宛在君家畫圖宿君今作牧向東魯泰山大夫更竒古
我詩恐未盡君意請君自作喬松譜

題半塘寺潤公房顧叔明所畫松壁

明孫寧

顧君叔明善寫松妙趣直與韋偃同片縑幅紙不易得
人爭一覩清雙瞳玉巖上人即粲可早躋十地成全功

禪房素壁耀霜雪繪畫未許來庸工叔明對此役意匠
捉筆跳叫聲摩空須臾貌作老蛟影毫端瞥若回腥風
隔座時疑翠濤響鈎簾日訝玄雲封宿鶴已去落花盡
庭前細雨春濛濛老夫尋幽適相過覽之便覺心神融
酒酣信手為長句醒愧浣花溪上翁

巨然松吟萬壑圖

元
元好問

宵中刺鯁無九澤畫裏風煙纔一漚阿師定有維摩手
斷取江山著筆頭石林蒼蒼崖寺古銀河浩浩松聲秋

方外賞音誰具眼莫將輕比李營丘

題洞陽徐真人萬壑松風圖

元趙孟頫

謾謾松下風悠悠塵外心以我清淨耳聽此太古音逍遙萬物表不受世故侵何年從此老辟穀隱雲林

自畫萬壑松風圖

歌贈天台朱秉中梅花巢

明虞堪

天台萬八千丈山桃花久不流入人間上當牛斗開天關仙人幾度招我窮幽攀瓊臺玉闕迴寂寞石橋且滑空潺湲曾識高人姓朱者讀書縛屋蓬峰下一從畫得龍

馬神龜文走獻天子登天閣天子莫可官歸來老田野
最喜兩兒郎綠髮更瀟灑大者賦遠遊不肯卑微休仲
也誰與儔愛我畫滄洲聊將水墨趣寫此空巖秋鴈蕩
雲連赤城暮瀟湘雨裏蒼梧愁我愛仲也琴傾耳大賞
音南風散五絃為我開煩襟棲鳥夜啼秋月墮黃鸝曉
嘯春山深君不見畫中絕似琴中趣萬壑秋風滿松樹
應有梅花可結巢隨意青山看雲去

題丁氏松澗圖

元

鄧文原

天目之峰凌紫煙，下周林壑紆長川。
清池斗絕涵倒影，神運直自疏鑿先。
彼美幽貞廬間房，曲奧辛夷荃蒼官。

一作松手植經幾年，靈虯天矯今參天。
門前朝流暮流水

但聞激石瀉瀨鳴濺濺，山人養真衡茅下有書可讀琴

可絃意行清澗曲，長歎松風前山。
一作溪月出林高溪花

弄春妍，仙人歌。
一作欲來夜將半，天空鶴唳山淒然。颺塵

大笑狂馳子，口誦丹訣傳真玄。我欲從之結鄰屋，得疏

藥圃謀芝田

題簡生畫澗松

元虞集

簡生與我皆蜀人留滯東南凡幾春每拂齊紈作山水
使我感慨懷峨岷如此長身兩松樹滿谷悲風散陰霧
雌雄如劍變為龍鱗鬣齊成擘崖去祕閣嘗觀韋偃圖
蒼潤雄深世所無默識形神出模畫把筆蒼蒼增嗟吁
玉堂寶書本同館官府既分難復見摩挲新墨慰衰朽
鬢雪飄蕭數開卷昔我樵牧青城山坐起政在雙樹間
當時簡生若相見應并寫此聽潺湲劉郎集賢好賓客

好著幽牕對晴碧凌靈為我哦七言有鶴飛來破秋色
鬱鬱澗上松磊磊澗中石石泉有餘韻松枝有餘色高
人事幽討結廬此棲息敲枕聽潺湲開軒盼空碧俯仰
欣有契足以暢昕夕我亦厭塵囂久焉慕岑寂他年儻
相過勿謂予生客

古澗長松圖

元 吳 鎮

長松生風吹不歇古澗出泉鳴自幽玉屑飯餘移白日

題松澗圖

元 陳 樵

紫芝歌動振高秋

題王起宗畫松巖圖

元楊載

雲起重巖鬱凌亂長松落落樹直幹若人於此結茅屋
爽氣飄然拂霄漢艤舟之子何逍遙從者偃僂攜一瓢
山中無日不閒暇跋涉相顧凌風颺始知王宰用意高
使人觀圖鄙吝消世間未必有此景塗抹變幻憑秋毫
丹青遊戲固足樂收絕視聽搜冥莫向來為政殊不惡
乃爾胸中有丘壑

松泉圖

元郭翼

迢迢澗上松
瀲瀲松下泉
微颺散晴雪
飛琴瀉寒絃
懷哉山中人
眇予隨塵緣
九江秀可攬
山色青於蓮
浩歌招黃鵠
重賦雲巢篇

松路山巖圖

明徐賁

清溪入花源
流水春溶溶
趣深屢迴轉
溪上森羣峰
參差樓閣間
縹緲神仙蹤
閑陪羽客行
時與樵人逢
疎蘿映崖瀑
薄雲蔭巖松
孤鶴偶徘徊
衆樹恒芳濃
踐茲非

徒遊要當盡從容因乏丹泉術終期此相從

題松溪圖

明 吳 溥

溪頭流水繞光寒溪上長松雪未乾無事儘從閑處樂
有書時向靜中看風迴陰壑泉聲急月轉清牕樹影團
幾度客來門未啓呼兒急為整衣冠

壑松圖

贈吳伯
徵歸歙

明 李日華

手寫髯龍伴讀書髯翁別我意踟躇聊分幾鬣臨牕影
君到黃山有萬株

壑松圖

明
李日華

已見歷落槩不妨小俯仰雲來翠色添雨壯空濤響沉
沉浸龍影颯颯凌仙掌山中絕灌溉歲月自滋長

御定歷代題畫詩類卷七十一